

# Lejer per ladin amò più bel

**Passa 50 persones se à troà per la maratona de letura**

Per trei domesdi de seghit, aló da la stua del Museo Ladin de Fascia, n muie de jent se à binà per tor pèrt a la scomenzadiva metuda a jir tel chèder de l'Aisciuda Ladina: la maratona de letura. Chesta scomenzadiva, senza pest, l'à dassen vedù na gran partezipazion da pèrt de jent da duta Fascia vegnuda per lejer jù n toch che ge é restà tel cher. Se n'à vedù vegnir da Penia fin ja Moena.

À tout pèrt dassen jent motivèda: l'era jent grana, joegn de la mesènes, bec de la populèra e adertura atores de teater che à volù meter a la leta n toch de spetacol. Chel che à fat più marevea l'é stat che ite per anter l'era ence jent da fora maridèda chiò te Val che à emparà a rejonèr fascian e che i à metù a la leta sia esperienza. Chesta persones se sent pèrt de la comunanza e per chest i à volù e amò i va inant a cognoscer miec noscia cultura con chela de la portèr inant e la meter a la leta de si fies.

Anter duc chi che à tout pèrt l'é stat jent che é jita a lejer più che n'outa. Chest vel dir esser portadores de en sentiment sciantif che porta a lejer per ladin con piajer e pascion.

N muie di letores fèsc pèrt de la sociazion fascèna de "I voluntadives del lengaz". Chesta sociazion,


metuda en esser acà pec egn, la dombra jent da duta Fascia. I voluntadives i se troa presciapech n'outa en setemèna. L'obietif l'é chel de se dèr jù per portèr inant la usanzas e i lurieres da zacan. Per no perder fora nascia arpejon culturèla la sociazion di voluntadives i reiona en cont de desvalives argomenc e i ge lascia lèrga al pensier ledech de vigni persona e ai recorc de la joeneza.

Nience a fèr a posta un di libes più lec per la maratona de letura l'é stat l liber de Simon de Giulio "Usanzas e lurgeres da zacan".

Dapò l'é stat ence letores che à let n toch scric jù da ic medemi e dapò poejies, articoi de giornai veies, conties e adertura na verscion per fascian de la "Divina Comedia" de Dante Alighieri leta jù dai joegn studenc de la mesèna de Ciampedel che per l'ocajion i se à ence trat ite l'guant da zacan. Anter i joegn l'é ruà doi bezes del liceo scientifich e n muie de bec de la populèra de Moena.

Ence jent che se dèsc jù per la doura del ladin no demò te chisc momenc che à let de bela conties e adertura ciantà vèlch toch de Re Laurin.

La maratona de letura, metuda a jir per l secondo an, l'à abù dassen n gran suzess. (vr)



**N muie de jent se à metù a la leta bolintiera per lejer vèlch tòch per fascian te la Maratona de letura.**